

A tergo: Dilecto filio Thomae electo Feltrensi, apud inelutum Dominium Venetiarum Nuncio nostro.

Tenor mandati caesarei. Carolus divina favente clementia electus Romanorum Imperator semper Augustus, rex Germaniae, Hispaniarum, utriusque Siciliae, Hierusalem etc., archidux Austriae, dux Burgundiae et Brabantis, etc.

Quum studia nostra consulendae quietis christianae semper potissima fuerint, ob idque et publica commoda privatis nostris negotiis anteferenda censuerimus. Animadvertentes hoc potissime tempore immanissimum turcum christianorum cervicibus terra ac mari insistere, qui quasi leo rugiens extra cirquens quaerit quem devoret, conspicentes quoque quantum audaciae et temeritatis immanissimus ipse turcus assumpserit, dum christianus spargitur sanguis, ipsique christiani Principes et Potentatus inter se digladiantur, Nos etsi sine culpa nostra ad bellum provocati arma in christianos hostes nostros vertere coacti fuerimus; quae potius in ipsos infideles movere sperabamus; quamvis ob causae nostrae iusticiam victores effecti victitricia arma in hostium fautores licite dirigere potuissemus. Cupientes tamen huic communi christianorum necessitati occurrere, ac tanto morbo antidotum praestare, ut sedatis tandem domesticis discordiis christianorum arma melius in prophanus ipsos christianae religionis hostes exerceri possint; sitque Respublica Veneta quae maximo semper adiumento ad hoc esse possit, et qua bene nobiscum consentiente afflictae iam tot bellis Italiae aliquantum respirare liceat; ea propter confisi nos de singulari fide, industria et non vulgari prudentia reverendi Marini Caraccioli consilarii nostri, quem hominem in magnifico Hieronimi Adurni consilarii et oratoris nostri locum suffecimus, eundem Marinum citra revocationem quorumcumque aliorum mandatorum nostrorum licet absentem tamquam praesentem facimus, constituimus et ordinamus per praesentes oratorem, procuratorem et mandatarium nostrum, ac quicquid eorum melius dici fieri et esse potest, ac cum eo pariter honorabilem consiliarium et oratorem nostrum apud illustre Dominium venetorum Alphonsum Sanchez et quemlibet eorum in solidum, ad specialiter et expresse pro nobis et nomine nostro, ac etiam quantum expediat nomine serenissimi Ferdinandi Infan-

tis Hispaniarum, archiducis Austriae etc., pro quo dato promittimus, cum interventu tamen et assistentia alicuius ad id a Sanctissimo Domino Nostro mandatum habentis, ac reverendissimi Pacei oratoris Serenissimi fratris et avunculi nostri Angliae regis, si adhuc ibi fuerit ipsique interesse voluerint, agendum, tractandum, capitulandum et concludendum cum illustri sincere nobis dilecto Antonio Grimano Duce Venetiarum, ac illo illustre Dominio Veneto, quaecumque foedera pacis, seu ligae et confederationis tam offensiva quam defensiva, aut inducias cuiuscumque generis fuerint et sub quibusvis verborum formulis, conditionibus et capitulis eisdem oratoribus et mandatariis nostris bene visis, et pro omnium et singulorum praemissorum observatione in animam nostram iurandum ac bona nostra obbligandum et hypothecandum, et generaliter omnia alia et singula dicendum, tractandum, paciscendum, conveniendum et concludendum, quae in praemissis et eorum quolibet vel inde dependentibus, emergentibus et connexis, necessaria vel opportuna visa fuerint, et quae nosmet dicere vel facere possemus si praesentes essemus, etiam si talia forent, quae mandatum exigerent magis speciale. Promittentes in fide et verbo caesareo nos ea omnia et singula firma, rata et grata habituros, quae in praemissis et circa ea, acta, tractata, conclusa et iurata fuerint, ac quovismodo non contravenire, imo ea inviolabiliter manutenere et observare, harum testimonio litterarum manu nostra subscriptarum et sigilli nostri appensione munitarum.

Datae in oppido nostro Vallis Oleti. Nona Mai, anno a nativitate Domini 1523, electionis sacri Imperii quinto, aliorum vero omnium regnorum nostrorum octavo.

Subscriptio manu sacratissimi Caesaris
CAROLUS.

Subscriptio secretarii:
Mandato Caesaris
G. ARGILLENSIS.

Henricus octavus, Dei gratia Angliae et Franciae rex, Fidei defensor, et dominus Hiberniae, universis ad quos praesentes litterae pervenerint, salutem. Quum inter serenissimum principem fratrem et consanguineum nostrum Carolum imperatorem semper Augustum, regem Hispaniarum et utriusque Siciliae etc. archiducem Austriae, ducem